


TEZAU LITURGIC

29 MAI

**SLUJBA
SF.CUVIOASE
DOMNICA
LIKVINENKO
DE LA
ALEȘKOV**



MOSCOVA, 2000



Служба блаженной Домнике Алешковской

НА ВЕЧЕРНИ

На Господи, воззвах стихиры, глас 8

О блаженная мати Домнико, /заступнице и покровительнице наша! / Ты от молодых ногтей твоих страх Божий имела еси в сердце твоём, / духовныя очи твои к Горнему Иерусалиму устремляющи / и помышляющи выну о будущих, / яже и получила еси, преподобная. / Темже ныне молися / даровати нам мир и велию милость.

О блаженная мати Домнико, / тя ходатаицу и молитвенницу благоприятну имамы к Богу, / ты бо молиши за вся православныя люди, / яко да избавимся от бед, и скорбей, / и от всякаго навета вражия. / Тем прославляем твою святую память, / и восхваляем тя, блаженную в женах, зовуще: / не престай молящися о душах наших.

О блаженная мати, / кто не подивится житию и чудесем твоим, и не восхвалит тя? / Яко и по

святем твоём преставлении / силою Божиею
многая чудеса от честных мощей твоих
источаеши, / яже подают исцеления
приходящим к ним с верою. / Сего ради
возопиим зовуще: / радуйся, преподобная мати
Домнико, / великаго дара от Христа
сподобившаяся / и ныне пребывающая во
Царствии Небеснем с лики преподобных, / моли
спастися душам нашим.

Слава, глас 6:

Воздержанием житие твое украсившая / и уды
умертвившая / победила еси вражия прилоги,
блаженная. / Темже со всеми святыми славим /
и торжествуем святую память твою, / просяще
обрести молитвами твоими / мир и велию
милость.

И ныне, Богородичен: глас 6:

Кто Тебе не ублажит, Пресвятая Дево, / кто ли
не воспоет Твоего пречистаго рождества, /
безлетно бо от Отца возсиявый Сын
Единородный, / Тойже от Тебе Чистыя пройде, /
неизреченно воплощся, / естеством Бог сый, /
и естеством быв человек нас ради, / не во двою
лицу разделяемый, / но во двою естеству /
неслитно познаваемый. / Того моли, Чистая,
Всеблаженная, / помиловатися душам нашим.

Вход. Прокимен дне.

Чтения 3, преподобническая:

Премудрости Соломоновы чтение

Праведных души в руце Божией, и не прикоснется их мука. Непщевани быша во очию безумных умерети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле искуси их и яко всеплодие жертвенное прият я. И во время посещения их возсияют и, яко искры по стеблию, потекут. Судят языком, и обладают людьми, и воцарится Господь в них во веки. Надеющийся Нань разумеют истину и вернии в любви пребудут Ему. Яко благодать и милость в преподобных Его, и посещение во избранных Его.

Премудрости Соломоновы чтение

Праведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни, зане десницею покрывает я и

мышцею защитит их. Приимет всеоружие
рвение Свое и вооружит тварь в месть врагом.
Облечется в броня правды и возложит шлем, суд
нелицемерен. Приимет щит непобедимый,
преподобие. Поострит же напрасный гнев во
оружие; споборет же с ним мир на безумных.
Пойдут праволучныя стрелы молниины и, яко от
благодаря лука облаков, на намерение полетят.
И от каменометных ярости исполнь падут грады,
вознегодует на них вода морская, реки же
потопят я нагло. Сопротив станет им дух силы,
и, яко вихор, развеет их и опустошит всю землю
беззаконие, и злодейство превратит престолы
сильных. Слышите убо, царие, и разумеите,
навыкните судии концев земли. Внушите,
державши множества и гордящися о народах
языков, яко дана есть от Господа держава вам и
сила от Вышняго.

Премудрости Соломоновы чтение

Праведник аще постигнет скончаться, в покои
будет. Старость бо честна не многодетна, ниже в
числе лет исчитается. Седина же есть мудрость
человеком, и возраст старости житие
нескверное. Благоугоден Богу быв, возлюблен
бысть, и живый посреде грешник преставлен
бысть. Восхищен бысть, да не злоба изменит
разума его, или лесь прельстит душу его.
Рачение бо злобы помрачает добрая, и парение

похоти пременяет ум незлобив. Скончався в мале, исполни лета долга. Угодна бо бе Господу душа его, сего ради потщася от среды лукавствия. Людие же видевше и не разумевше, ниже положше в помышлении таковое. Яко благодать и милость в преподобных Его, и посещение во избранных Его.

На литии стихиры, глас 1:

Свыше звана бывше, / а не от человек звание приим, / оставила еси труды земледелания твоего, / блаженная Домнико, / и на ниву многотрудную человеческих сердец / в годину богоборчества потекла еси усердне, / яко в вертограды Господа твоего, / во еже делати тыя и храните, / и многоплодны показати Владыце их, / да вера Православная паки на Руси Святей воссияет / в сердцах чтущих святую память твою.

глас 2:

Никтоже чести сам себе приемлет, / но званный от Бога, / темже и ты, святая мати Домнико, / не собою, ниже похотением людским, / но призванием божественным на делание твое многотрудное изшла еси, / ни на почести, ниже пиры, или телеси усладу, / но на поприще суроваго и терноноснаго жития, / на немже

радость едина тя среташе, / яже веселит Христа
исповедати не убоявшихся.

Слава, глас 6:

Возсия днесь священное твое торжество, /
солнца светлейши, / сущия во тьме души
озаряющее, мрак бесовский всегда отгоняющее,
/ досточудная мати Домнико.

И ныне, Богородичен, глас тойже:

Теплое заступление сущим в бедах / и
Помощницу нашу, / Еюже от тли избавихомся, /
Богородицу, вернии, всеусердно ублажаем.

На стиховне стихиры, глас 6:

Звана бысть свыше от овчих стад, святая
Домнико, / якоже псалмопевец Давид, / гордая
безбожных филистимлян низпроврещи, / и тем
моли народ от Голиафовых хулений заступити, /
и яко овцы упасти и оградити. / Темже и тебе
на брань доведется укрепити руце, / и камением
веры безбожных гордыню сокрушати, / и мечем,
и посохом поучения и молитвы / волки хищныя
невходны во ограду сотворити, / в нейже и ны
молитвами твоими, / блаженная Домнико,
сохрани.

Стих: Честна пред Господем смерть
преподобных Его.

Достойне хвалима еси на земли, /
богоблаженная Домнико, / яко и по кончине
твоей усердно к тебе прибегающия / от недуг
свобождаеши. / Темже непрестанно моли
/спастися душам нашим.

Стих: Праведницы во веки живут, и в Господе
мзда их.

Ангельское житие на земли явила еси, /
Домнико блаженная, / источниче умиления,
милости течение, / елеем трудов твоих
просвещая верно хвалящих тя. / Моли
Человеколюбца от бед избавити / любовью
чтущих всечестную память твою.

Слава, глас тойже:

Воздержанием житие твое украсивши / и плоть
духу покоривши, / победила еси вражия
прилоги, / во смирении же и пощении Бога
взыскавши, / богоблаженная.

И ныне, глас тойже:

Богородице, Ты еси лоза истинная, /
возрастившая нам Плод Живота, / Тебе
молимся: молися, Владычице, / со святыми
апостолы, / помиловати души наша.

Тропарь, глас 5:

От юности желанием Божественныя любви
разжигается, / суету житейскую отринувши, /
смирением крайним и молитвою непрестанною
/ мудрость Христову стяжала еси /и в годину
лютую явилася еси наставница ищущим
спасения. / Темже предстоя ныне Господеву в
лице святых, / поминай молящихся тебе, /
Домнико, мати блаженная.

Ин тропарь, глас 7:

Чистоту жития твоего явивши, / блаженная
мати Домнико, / в подвизах покаяния и
смирения Богу угодила еси, / сего ради
благодать стяжала еси / люди любовью
ограждать, / от скорбей и печалей избавляти. /
Моли Христа Бога / даровати нам велию
милость.

НА УТРЕНИ

На Бог Господь, тропарь тойже.

По 1-й кафизме седален, глас 4:

Мужески подвиги воздержанием претерпевши,
низложила еси многокозненнаго, и в терпении
житие проживши, преподобная Домнико, ныне
прешла еси к Богу молящихся о всех, священное
твое совершающих торжество.

Слава, и ныне, Богородичен:

Всепорочная Мати, возсияй ми покаяния
лучу, и разори мрак безмерных моих зол,
лукавыя отжени, Дево, помыслы сердца моего.

По 2-й кафизме седален, глас 4:

Плоть распяла еси со страстьми, и все любление
ко Христу имела еси, Домнико, Жениху твоему
нетленному. Сего ради прияла еси венец, и
ангельским ликом сочислилася еси, блаженная,
молящися Тому прилежно о чтущих тя.

Слава, и ныне, Богородичен:

Труждает мя буря греховная, и возмущение
безместных помышлений: умилосердися
Всепорочная, и руку ми помощи, яко
Милостива простри, да спасся, величаю Тя.

Величание:

Ублажаем тя, / святая блаженная мати
Домнико, / и чтим святую память твою, / ты бо
молиши о нас / Христа Бога нашего.

Псалом избранный: Терпя потерпех Господа:

По полиелеи седален, глас 8:

Избранная от Бога блаженная мати, ко
пристанищу жизни наставляема, без волнения
жития бурю претекла еси, со ангелы

песнословящи Избавителя, и молящихся
непрестанно о нас, яко да благодать и милость
Христос дарует нам, празднующим любовь
святую память твою.

Слава, и ныне, Богородичен:

Радуйся, ангелом радость мира приемшая.
Радуйся, рождшая Творца Твоего и Господа.
Радуйся, сподобльшаяся быти Мати Божия.

Прокимен: Дивен Бог во святых Своих, Бог
Израилев.

Стих: В церквах благословите Бога, Господа от
источник Израилевых.

Всякое дыхание: Евангелие от Матфея, зачало
104.

По 50-м псалме стихира, глас 6:

Житие твое, яко солнце / сердца верных озари /
и многая к познанию истины приведе. / Темже
и нас светом невечерним просвети, / мати
блаженная Домнико, / всечестную твою память
почитающих.

КАНОН, глас 6

Песнь 1

**Яко посуху пешешествовав Израиль, /по
бездне стопами, /гонителя фараона / видя
потопляема, / Богу победную песнь /поим,
вопяше.**

**Прпев: Святая блаженная мати Домнико,
моли Бога о нас.**

Просвети ми ум и озари чувства моя,
согрешений мрак души моея отгнав, Христе
Боже, да чистою совестью возмогу песнь
составити и возвеличити угодницу Твою,
блаженную мать нашу богомудрую Домнику.

Небесный Отец благоизволи тя прославити в
Царствии славы со Ангелы и Святыми Своими,
идеже во свете невечернем и присносущнем
предстоиши Ему, свято и праведно на земли
поживши, подвигом юродства Христа
прославила еси и ныне молишися о всех, чтущих
святую память твою.

Слава: Дивное и преславное чудо явился на тебе,
преподобная мати, ангельски бо на земли
пожила еси и, веру адамантову имея, победила

еси немощь плотскую и прияла еси от Бога
венец нетленный.

И ныне: Великому милосердию Агнца Твоего
причастники сотвори нас, Богородице, в день
великаго и славнаго Суда Его, егда второе на
землю приидет со славою страшною.

Песнь 3

**Несть свят, / яко же Ты, Господи Боже мой,
/ вознесый рог верных Твоих, Блаже, / и
утвердивый нас на камени/исповедания
Твоего,**

Небесная возлюбивши, вся красная мира сего
оставила еси, преподобная, и во обитель
вселиши, неленостными трудами постничества
Богу угодила еси, Егоже моли спастися душам
нашим.

Христа нас ради волею до зрака рабья
смирившагося возлюбила еси, блаженная,
бдением и молитвами душевныя страсти
умертив, на гору безстрастия взошла еси,
Домнико богومудрая.

Слава: Мрак житейских заблуждений и
житейския гордости светлостью святых молитв,

Домнико святая, прожени, да помощию твоею грехов оставление приемше, милость у Христа Бога обрящем.

И ныне: Препоблагословенная Богородице, многая скорби в земней жизни Твоей претерпевшая, помози нам крест земнаго жития в терпении, благодарении и радовании до конца понести.

Седален, глас 4:

Любит милость и истину Господь, и ты, блаженная мати Домнико, подобяся Тому, буди милостивая ходатаица о спасении нашем, да тебе ради и мы, обретше благодать, не отпадем вечныя славы, яко память твою святую песньми ныне величаем.

Слава, и ныне: Богородичен:

Уневестившаяся Создателю Твоему, Дево Невестная и Мати Избавителя нашего Христа, моли Духа Святаго Господа вселиться в ны и присно в нас пребывати и скверну нашу очистити, яко много может молитва праведныя матери, Домники блаженныя, еяже, яко Мати Милосердная, молитвы о нас приими.

Песнь 4

Христос моя сила, / Бог и Господь, / Честная Церковь / боголепно поет, взывающи, / от смысла чиста, о Господе празднующи.

Христолюбивых людей в вере и благочестии наставляла еси, мати святая, непрестанные молитвы о спасении их возносила еси Вседержителю. Темже молим тя: молитвами твоими и нас достойными наследниками Царствия Небесного содей.

Подвиги твои духовные под личиною юродства скрыла еси, Домнико богомудрая, и, аки крин небесный, процвела еси в земли Херсонстей добродетельми твоими: смирением, терпением скорбей и молитвами, яже непрестанно Господеву возносила еси. Сия же боголюбивыя добродетели испроси и нам, творящим ныне святую память твою.

Слава: Подвиг твоих великих и славных ради, прияла еси венец нетленный от Христа Спаса нашего и ныне с преподобных и блаженных лики на небесех присно радуешься, поминай убо и нас, святая мати наша Домнико, да молитвами твоими сподобимся и мы улучшить Царствие Небесное.

И ныне: Заступнице скорбящих, Надеждо ненадеющихся, Богородице Всепетая, моли прилежно избавится нам от бед и скорбей.

Песнь 5

**Божиим светом Твоим, Ближе, /
утренующих Ти души любовью озари,
молюся, / Тя ведети, Слове Божий, /
истиннаго Бога, / от мрака греховнаго
взывающа.**

О святая мати наша, преподобная Домнико,
предстояще престолу Божию, нас, долу сущих,
от всякия находящия на ны напасти сохрани,
вся раздоры и брани умири, да прочее время
жизноты нашего во всяком благочестии и чистоте
поживем, твоими молитвами ограждаеми.

Исцеления подаеши всем, с верою к тебе
притекающим, Домнико святая, темже ныне
молим тя мы, грешнии: печаль нашу на радость
преложи и от всякия напасти и скорби святыми
твоими молитвами нас избави.

Слава: Во узах темничных и иных
злостраданий сущим отраду и вспоможение
святыми и всеильными твоими молитвами
даруеши и к покаянию всех нас призываеши.

И ныне: К Тебе припадающе, Царице Небесная,
и верою покланяющемся, славословим Тя:
радуися, Богоблаженная Дево, покрове и

ограждение наше, Помощнице в бедах сущим,
спаси ны, помощи не имущия, на Тя бо
упование возлагаем.

Песнь 6

**Житейское море, / воздвигаемое зря
напастей бурю, / к тихому пристанищу
Твоему притек, вопию Ти: / возведи от тли
живот мой, Многомилостиве.**

Разум богопросвещенный стяжавши, Домнико
блаженная, егда дела благая творила еси в
житии твоём и егда подвиг юродства Христа
ради подъяла еси, и ныне душа твоя во благих
водворяется, прияла бо еси от Бога нетленный
венец.

Добродетелию преукрашенная и благодатию
Божественною освященная, праведная мати
наша Домнико, предстоиши во славе небесней и
молишися за ны, подаеши нам путей
спасительных разумение и недужныя силою
Христовою исцеляеши и подвизаеши нас за вся
Творца нашего благодарити.

Слава: Родителей, чад не имущих, и жен
плодоносящих отрада и вспоможение еси, мати
Домнико, поелику присно молитвы твоя
возносиши Милосердному Спасителю нашему.

И ныне: Мати Божия Милосердная, милости Твоя двери отверзи нам, озари нас светом Божественных благодати Твоя и от мысленных волков соблюди нас невредимых, в вере Христовой нерушимо сподобивши нас благоугождати Сыну Твоему и Богу, и прияти от Него конец благий.

Кондак, глас 8:

Силою укрепляема Всемогущаго Бога, / в немощнем естестве подвиги многотрудныя явила еси, / и долу влекущая страсти / чистотою и бдением непрестанным умертвила еси. / Сего ради Христос Бог тя прослави дивными чудесы, / мати блаженная Домнико, / Емуже прилежно молися / подати нам мир и велию милость.

Икос:

Ангельскому поревновав житию, всю себе отрешила еси мирскаго сплетения, к подвигом же постническим мужески вооружившись, опасно путем Божиих заповедей шествовала еси, блаженная. Темже и мы, верно чтущии священную твою память, молим тя: Христу прилежно молися подати нам мир и велию милость.

Ин кондак, глас 8:

В мире сем благочестно и праведно поживше, /
молитвою, юродством и иными подвиги
досточудными Богу угодила еси, / сего ради и
Господь в чудесех преславно тя показа, / Егоже,
святая мати наша Домнико, моли / сохранить
град сей и всех людей, благочестно тя
почитающих.

Песнь 7

*Росодательну убо пещь / содела Ангел
/преподобным отроком, / халдеи же
опаляющее веление Божие, / мучителя
увеща вопити: / благословен еси, Боже отец
наших.*

Евангельским словесем внемлюще, крест свой
на рамена восприяла еси и Христу последовала
еси, преподобная мати наша Домнико,
непрестанно Тому взывающе: благословен еси,
Боже отец наших.

Вся искушения от мира, плоти и диавола
находящая низложивши, востекла еси в чертоги
Отца нашего Небеснаго, богоблаженная
Домнико, идеже предстательствуеши о нас,
заступления Твоего просящих и подвизаеши
купно с Тобою взывати: благословен еси, Боже

отец

наших.

Слава: Кадилу, елею и миру благоуханному
 молитвы твоя подобны, восходят бо сия ко
 престолу Вседержителя Бога и милость Его
 преклоняют к нам, сердца же наша умягчают и
 врачуют и подвизают взывати: благословен еси,
 Боже отец наших.

И ныне: Милостию Твоею весь мир обогащаеши
 и души просвещаеши, Единая Всепетая, темже
 воспеваем Ти: Христа Бога нашего Мати,
 благословенна еси.

Песнь 8

**Из пламене преподобным росу источил еси/и
 праведнаго жертву водою попалил еси: / вся
 бо твориши, Христе, токмо еже хочети. /
 Тя превозносим во вся веки.**

В законе Божиим часто поучающихся и в
 заповедех Божиих безпорочно ходяще, дом Духа
 Святаго была еси, блаженная Домнико, темже и
 по смерти твоей не отлучи тя Господь от лика
 праведных, с нимиже ныне Богу поеши:
 превозносимый отцев Боже, благословен еси.

Кротостию ко всем землю кротких наследовала
 еси, милосердием и любовью ко ближним

помилование от Бога получила еси, чистотою и целомудрием Бога зрети сподобилася еси, Емуже ныне со всеми святыми поеши: превозносимый отцев Боже, благословен еси.

Слава: Яко светило светлое уготовала еси кроткую душу твою, преподобная мати Домнико, темже по смерти твоей многая исцеления недужным, от винопития и иных болезней душевных и телесных подаеши всем с верою имя твое призывающим и нелицемерно Творцу воспевающим: превозносимый отцев Боже, благословен еси.

И ныне: Господа моего и Бога Мати Безневестная, дерзновение имущи к Нему, заступи и сохрани мя Твоим ходатайством, яко да воспою: превозносимый отцев Боже, благословен еси.

Песнь 9

Бога человеком невозможно видети, / на Негоже не смеют чини Ангельстии взирати, / Тобою же, Всечистая, явися человеком / Слово воплощенно, /Егоже величающе, / с Небесными вои / Тя ублажаем.

Разум имела еси в души, и смирение, и

Божественную кротость, и веру несумненну, и любовь к Богу, всеночными мольбами приближающися Ему и тамо сущими светлостями ублажаема, озаряема и просвещаема.

Отошла еси в селения праведных и духом предстоиши Присносущному Свету: призри убо на ны, живущия в селениях многмятежнаго мира сего, и пособствуй сущим во бранех, угоднице Христова, яко песньми тя величаем.

Слава: Моления о нас ко Владыце Христу не престай приносить, святая Домнико, яко мати чадолюбивая, вспомоществуя верным в подвиге спасения, яко сосуд благодати Божия избранный.

И ныне: Ты еси Ангелов радости, ты еси праведников доброто, ты еси верных Надежду; ты еси соблюдение наше, ты еси мост к жизни нестареющей приводяй всех, верую и любвию Тя, Богородице, величающих.

Светилен:

Якоже солнце светоносно, возсия ныне, блаженная мати, память твоя, вся верныя веселящи, иже молитвенно взывают ти: молися прилежно спастися нам.

Слава и ныне, Богородичен:

Преблагословенна еси, Богородице Дево, Мати
Неизреченного Света, Тя величаем и
предстательства о нас пред Сыном Твоим
всеусердно просим, Тя бо едину надежду имамы.

На хвалитех стихиры, глас 4:

Празднует Церковь твое преставление / и
благознаменитый день твоего торжества:
/ житие бо на земли благочестно пожив, /
Домнико преславная, / плод сторицествующий
Владыце твоему принесла еси / и от Него
сподобилася еси славы неизреченная, / и ныне
молишися о спасении душ наших.

Класы спелыя руце твои пожинаша, / егда
землю, от неяже яко всяк человек изыде,
возделоваше, / и се яко клас златый душа твоя
восхищена бысть в житницу Христову, / и ныне
просим тя, / мати блаженная Домнико: / молися
о благоденствии нашем на земли / и вечном
спасении на небесех. В подвигах твоих
молитвенных / привлекала еси многая души ко
спасению, / сего ради Христос знаменьями и
чудесы преславными / истинно тя украси, /
мати блаженная Домнико, / моли о душах
наших.

Слава:

Избави молитвами твоими, / мати Домнико,
чада твоя / от всякия лютости противоборца / и
Царствия Божия ны доведи, / молящихся тебе
тепле, / да возможем ловления лукаваго
избегнути / и конечнаго осуждения
предстательством твоим.

И ныне, глас 8:

Еже содеяхом злая, / не помяни нам, Благая
сущи, / егда душа наша разлучатися будет
настоящего сего жития, / не возгнушатися
молим Тя нашего недостойнства, / аще и много
согрешаем вси, / буди нам, Мати, Заступница.

НА ЛИТУРГИИ

Прокимен, глас 7: Честна пред Господем /
смерть преподобных Его.

Стих: Что воздам Господеви о всех, яже воздаде
ми?

Апостол к Галатам, зачало 208. Аллилуиа,
глас 1: Терпя потерпех Господа, и внят ми, и
услыша молитву мою.

Евангелие от Луки, зачало 33. Причастен: В
память вечную будет праведник:

